



**KEMENTERIAN PERDAGANGAN DALAM NEGERI DAN
KOS SARA HIDUP
DAN
KEMENTERIAN EKONOMI**

**KENYATAAN MEDIA BERSAMA MENGENAI TINDAKAN DAN
PELAN KERAJAAN BERKENAAN KOS SARA HIDUP**

1. Inflasi dan kesannya terhadap harga barangan terutama barangan keperluan asas telah melanda dunia sejak semua sektor ekonomi dibuka semula dalam fasa pasca-pandemik COVID-19 sehingga kini. Negara kita tidak terkecuali. World Bank, IMF dan ramai pakar ekonomi dunia dan tempatan mengunjurkan keadaan ini akan bertambah buruk di tahun 2023. Ini juga diakui melalui data-data yang dibentangkan oleh Jabatan Perangkaan Malaysia (DOSM) dalam beberapa siri mesyuarat dan forum sejak tahun 2021 dan terkini pada Disember 2022.
2. Kerajaan telah mengambil beberapa langkah proaktif dalam menangani isu ini, termasuk tindakan jangka pendek dan sederhana.
3. Tempoh dua minggu yang diberikan oleh YAB Perdana Menteri kepada kementerian-kementerian yang terlibat semasa Mesyuarat Khas NACCOL pada 27 November 2022, telah disambut dan cadangan-cadangan daripada kementerian tersebut telah dibentangkan dalam Mesyuarat NACCOL susulan yang telah diadakan pada 13 Disember 2022 dan Mesyuarat Jemaah Menteri pada 14 Disember 2022.

4. Selain daripada itu, beberapa siri mesyuarat lain yang lebih berfokus telah diadakan di sebalik tabir. Ia melibatkan beberapa pemegang taruh termasuk kementerian, pemain industri, ahli akademik, dan wakil pengguna.

5. Antara keputusan penting kerajaan adalah seperti berikut:
 - (i) Tarif elektrik kekal untuk pengguna domestik, komersial, dan industri. Ini dibuat atas kesedaran bahawa kenaikan tarif elektrik tanpa program sokongan dan bantuan lain akan memberi kesan terhadap kos operasi pengeluar yang akhirnya memberi impak terhadap harga barangan pengguna;

 - (ii) YAB Perdana Menteri telah memutuskan, hasil rundingan dengan BERNAS, bahawa BERNAS akan menyalurkan peruntukan RM60 juta kepada petani beras RM10 juta bagi 2022 dan RM50 juta bagi 2023. Ini adalah sebahagian daripada langkah Kerajaan untuk membantu pesawah dalam menguruskan kos sara hidup mereka yang turut meningkat;

 - (iii) Kawalan harga dan subsidi ayam standard dan telur Gred A, B, dan C diteruskan sehingga suatu tempoh yang ditetapkan;

 - (iv) Telur import telah mula masuk dan berada di pasaran tempatan. Kementerian Pertanian dan Keterjaminan Makanan (MAFS) komited untuk mengatasi isu bekalan telur dengan tindakan jangka pendek ini sehingga bekalan daripada pengeluar tempatan kembali pulih. Apa jua faktor yang menyebabkan bekalan telur terganggu sejak bulan September 2022 akan diselesaikan dengan rasa tanggungjawab walaupun kita tahu ekosistem pengeluaran telur akan mengambil masa sekurang-kurangnya enam (6) bulan sehingga satu (1) tahun untuk diatasi. Kerajaan sedar bahawa

penyelesaian bekalan harus dibuat dengan teliti tanpa memberi impak negatif kepada pengeluar dan peniaga-peniaga kecil dan mikro seperti yang berlaku sebelum ini;

- (v) Melalui libat urus antara Kementerian Perladangan dan Komoditi (MPIC), KPDN, dan pemain industri pengeluar minyak masak, MPIC sedang memperincikan pelaksanaan Harga 2 Peringkat bagi minyak sawit mentah supaya harga minyak masak tulen kemasan botol di pasaran domestik dijual pada harga yang lebih rendah bagi mengurangkan tekanan terhadap permintaan dan penggunaan minyak masak bersubsidi polibeg 1kg;
- (vi) KPDN juga telah melancarkan OPS TERJAH selama satu (1) bulan untuk menggerakkan 2200 orang Pegawai Penguatkuasa dalam mengetatkan operasi pemantauan harga dan keberadaan barangan keperluan asas di pasaran meliputi seluruh negara;
- (vii) Kerajaan sedang usahakan langkah jangka masa sederhana di peringkat bekalan (supply side) dengan menangani kekurangan bekalan untuk kegunaan tempatan. Kerajaan akan mengambil langkah mengimport bekalan barangan keperluan asas yang diperlukan untuk memenuhi permintaan pengguna tempatan. Pada masa sama, adalah wajar untuk kerajaan bekerjasama dengan pemain industri tempatan untuk memperkasakan dan juga memperkukuhkan bekalan barangan keperluan asas tempatan supaya negara tidak perlu bergantung sepenuhnya pada pembekal dari luar.
- (viii) Kementerian Ekonomi akan memberi tumpuan jangka pendek kepada kebertanggungjawaban harga berpatutan (fair price accountability) dengan membangunkan ekosistem berasaskan

data-data harga dari seluruh negara untuk menyuntik keanjalan harga dan bekalan. Ekosistem ini akan membantu menambah keanjalan di sebelah permintaan, sebagai satu usaha mengawal inflasi di masa akan datang;

- (ix) Hasil daripada beberapa siri libat urus bersama tokoh ekonomi universiti tempatan, terdapat cadangan untuk mewujudkan Sistem Perlindungan Sosial Baharu melalui pendekatan subsidi bersasar. Perkara ini juga sedang diteliti oleh beberapa Kementerian dan diketuai oleh Kementerian Ekonomi;
 - (x) Jawatankuasa Pemantauan Pelaksanaan NACCOL yang dipengerusikan oleh YAB Timbalan Perdana Menteri adalah bagi memastikan ke semua keputusan Kerajaan berkaitan dengan agenda kos sara hidup dipantau secara strategik dan berfokus agar semua keputusan dilaksanakan dengan baik. Jawatankuasa ini tidak akan bertindih dengan mana-mana jawatankuasa sedia ada kerana ia lebih bersifat pemantauan, pelaksanaan dan komunikasi strategik
6. Perancangan pelaksanaan beberapa solusi pantas (quick wins) sedang diperincikan oleh KPDN serta Kementerian Ekonomi. Ini termasuklah pelan tindakan kerjasama rentas kementerian dan mengemaskini beberapa prosedur pelaksanaan dasar. Ia dijangka akan dilaksanakan bermula penghujung Januari 2023.
7. Menerusi pelbagai perbincangan tersebut, ada keputusan yang sedang dilaksanakan dan ada yang masih memerlukan perincian. Kerajaan komited dalam membantu rakyat, tanpa menjejaskan kedudukan ekosistem perniagaan serta industri yang masih dalam tempoh pemulihan pasca pandemik COVID-19.

8. Pengawalan inflasi dan juga kos sara hidup memerlukan kerjasama semua pihak yang terbabit dalam rantai nilai (value chain), termasuklah kerajaan, pengeluar, peniaga dan juga rakyat. Kos sara hidup bukan sahaja berlegar tentang harga murah tetapi harga adil (fair) kepada pengeluar, peniaga, dan pengguna.
9. Kerajaan berharap agar perkara ini akan memudahkan pengurusan kos dan seterusnya memastikan segala penjimatan dapat dialirkan kepada para pengguna seterusnya meringankan beban kos sara hidup rakyat Malaysia.
10. Pengguna disaran untuk terus memperkukuhkan peranan mereka sebagai pengguna bijak. Perkara ini boleh dicapai dengan memberi fokus kepada langkah-langkah ini:
 - (i) merancang perbelanjaan dengan baik sebelum melakukan pembelian;
 - (ii) menyesuaikan kecenderungan sekiranya terdapat barang pengganti kepada barang yang telah meningkat harganya;
 - (iii) sentiasa membuat perbandingan harga. KPDN mempunyai aplikasi iaitu Price Catcher yang akan membantu pengguna membandingkan harga di antara premis; dan
 - (iv) membeli dalam kuantiti yang diperlukan serta tidak mengamalkan pembelian panik.
11. Pada masa yang sama, Kerajaan akan tetap meneruskan semua peranan semasa serta sedang meneliti peranan-peranan lain yang boleh dimainkan. Justeru, kerjasama serta peranan semua kementerian akan digembleng. KPDN dan Kementerian Ekonomi bersetuju untuk mewujudkan satu sekretariat bersama yang akan menjadi satu platform

di peringkat pegawai untuk membincangkan peranan pelbagai agensi dalam menangani kos sara hidup.

12. Kerajaan melalui KPDN juga akan mempergiatkan usaha agar perdagangan domestik terus berkembang. Justeru, bagi langkah tersebut agenda francais, jualan langsung serta peranan sektor peruncitan dan borong akan diperkukuh. Perdagangan domestik yang merupakan penyumbang signifikan terhadap KDNK negara akan terus dirancakkan agar manfaat dapat terus sampai ke golongan sasaran dan di masa yang sama turut meningkatkan peluang pekerjaan. Ini sudah pasti akan memberi peluang kepada rakyat untuk terus meningkatkan pendapatan dan untuk bersama-sama Kerajaan dalam mengharmonikan semula ekonomi domestik selepas terjejas teruk apabila pandemik COVID-19 melanda.

YB DATUK SERI SALAHUDDIN AYUB
MENTERI PERDAGANGAN DALAM NEGERI
DAN KOS SARA HIDUP

YB RAFIZI RAMLI
MENTERI EKONOMI